

TE HUIEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 5.

Me, 1924.

Mat. 18.

*Ua viivii te fenua i raro a'e i te taata ra; ua hapa ratou
i te ture ra; ua ruri-ê-hia e ratou tei haapaohia ra; ua pi'o
ratou i te faufaa haapao-tamau-hia ra. Isaia 24: 5.*

Na Huru Haapiiraa e Piti

(Tuatiraa teie nei parau.)

11. Ta te Haapaoraa êê

Aita roa to te taata e oraraa hou to'na fanau raa-hia
mai i roto i teie nei ao.

11. Ta te Bibilia

O te varua e te tino, o te taata ora ia. Genese 2: 7.
No ô mai i te Atua ra ia to tatou mau varua. Koheleta
12: 7. I te taima no te hamāniraa i te ao nei, tei reira
atoa te mau tamarii a te Atua. Ioba 38: 7.

12. Ta te Haapaoraa êê

Te hi'araa o Adamu rana o Eva, e hara rahī hi'o-ore-
hia ia.

12. Ta te Bibilia

Ua haapaohia o Iesu Mesia hou te hamāniraa i teie nei
ao ei Arenia na te Atua ia hopoi ê atu i te hara o te ao nei.
Ioane 1: 29. Ua faatoroahia Oia ei Faaora no tatou hou
teie ao, e no reira e mea hi'o-ê-hia na iho â te hi'araa.

13. Ta te Haapaoraa êê

Aita'tu hoi e mea e tia'i ia tatou ia rave e faaorahia'i tatou, maori râ ia faaroo i te Mesia.

13. Ta te Bibilia

Te haapii papu mai nei te Bibilia ia tatou e, e roaa ia tatou te ora na roto i te faaroo e te haapao. "Oia atoa te faaroo, aore e ohipa ra, e mea pohe ia, i te mea te vai hoê noa ra." Iakobo 2: 17.

14. Ta te Haapaoraa êê

O te faaorahia ra, hoê â hanahana to ratou.

14. Ta te Bibilia

Ua papu ta te Bibilia haapiiraa i te mea e, e hanahana ê to te tahi i to te tahi. Faaite atura Iesu i ta'na mau pîpî e, "E rave rahi te parahiraa mau i te fare o tau Metua ra." Ioane 14: 2. E parau atura Paulo no te hanahana o te mahana, no te hanahana o te marama, e no te hanahana o te mau fetia. Korinetia 1, 15: 41.

15. Ta te Haapaoraa êê

E haere tia'tu te taata parau-tia i to'na hanahana mure ore ra i to'na poheraa.

15. Ta te Bibilia

Tei muri a'e te haavâraa i te tia-faahou-raa. Apokalupo 20: 12. No reira, na papu e, eita ia te taata e faataahia no to'na faaeearaa mure ore ra, maori râ ua na mua oia i te haavâhia.

16. Ta te Haapaoraa êê

E utua mauui mure ore to te feia hara.

16. Ta te Bibilia

"E teie nei, e parau atu vau ia outou, E tia te mau hara atoa e te faaino a te taata nei ia faaore, eita râ te faaino i te Varua e faaorehia." Mataio 12: 31. Te toeâ o te mau hara, maori râ teie hara hopea i faaitchia i mua nei, e tia ia ia faaorehia, ia hoo na roa te koderane iti hopea ra. Mataio 5: 26.

17. Ta te Haapaoraa êê

Hoê ana'e huru utua e roaa i te feia hara, noa'tu te huru ê te hara a te tahi i ta te tahi.

17. Ta te Bibilia

Te vai ra te mau huru utua e au ai i te mau huru hara. E huru tia'e i te tahi oire ia haamahu ia tae i te mahana haavâraa i te tahi oire. Mataio 10: 15. E papaihia te tahi e rave rahi te tairiraa; e te tahi râ, e mea iti te tairiraa. Luka 12: 47.

18. Ta te Haapaoraa êê

E haere tia'tu te feia hara i te vahi mauini mure ore i to ratou poheraa.

18. Ta te Bibilia

Ia pohe te feia hara, e haere ratou i te hoê vahi i faa-taahia no te mau varua; ei reira ratou e faaroo ai i te Evan-elia. Petero 1, 3: 18-19.

19. Ta te Haapaoraa êê

Aita e ravea no te haapiiraa i te Evanelia e no te fariu-raa mai i te Fatu i muri i te poheraa.

19. Ta te Bibilia

Te a'ohia ra te Evanelia i muri i te poheraa. A'o'tura Iesu Mesia i te mau varua i roto i te tapearaa. Petero 1, 3: 19. Na roto i te bapetizoraa i te taata ora no te feia i pohe, e roaa i taua mau varua o tei tupu hoi to ratou faaroo e te tatarahapa i roto i te tapearaa ra te faaoreraa i ta ratou mau hara. Korinetia 1, 15: 29.

20. Ta te Haapaoraa êê

Eita e riro i te taata nei te huru maitai no te Atua.

20. Ta te Bibilia

Ua parau atura Ioane e, "E riro tatou mai ia'na atoa te huru." Ioane 1, 3: 2. Faaue atura Iesu i ta'na ra mau pîpî e, "Ia maitai roa hoi outou mai to outou Metua i te ao e maitai roa ra." Mataio 5: 48.

HISTORIAN'S OFFICE

Church of Jesus Christ of Latter-day Saints

47 East South Temple St.

SALT LAKE CITY, UTAH

21.

Ta te Haapaoraa êê

Eita e ora noa te ma'i i te faaroo ana'e i teie nei tau.

21.

Ta te Bibilia

Ua parau pâpû atura Iesu e, e riro i te feia faaroo teie nei mau tapao, oia hoi, te tiahiraa demoni, te parauraa i te parau êê, te iritiraa i te parau êê, e te faaoraraa i te ma'i. Mareko 16: 17-18. Aita teie nei mau tapao i parauhia no te hoê tau ana'e; no te mau tau atoa râ e itehia'i te feia faaroo, mai i te ora atoa hoi te huru.

22.

Ta te Haapaoraa êê

Aita e roaa i te taata nei i teie nei tau te heheuraa no ô mai i te Atua ra na roto noa i to'na faaroo e te parau-tia.

22.

Ta te Bibilia

O te Varua Maitai ra, o te varua ia no te heheuraa. E ore hoi ta'na parau e riro e na'na iho; e rave hoi oia i ta te Metua ra, a faaite mai ai i te taata nei. Ioane 16: 13-14. Ia parau tatou e, eita te Varua e horoa faahou mai i te heheuraa, na parihia hoi te Atua i te haapao i te huru o te taata nei, e i te hi'o pae tahi mai ia ratou.

23.

Ta te Haapaoraa êê

E ere ia te baptizoraa a Ioane Baptizo i te baptizoraa Cherisetiano.

23.

Ta te Bibilia

O te baptizoraa a Ioane, o te haamataraa iho â ia no te Evanelia a Iesu Mesia. Mareko 1: 1. No te haamatararaa ia i te hara; oia atoa te baptizoraa Cherisetiano. Ohipa 2: 38. Ua farii Paulo i te baptizoraa a Ioane ei baptizoraa mau. Ohipa 19: 4-5.

24.

Ta te Haapaoraa êê

E baptizoraa atoa ia te pîpîraa mai te utuhiraa te huru.

24.

Ta te Bibilia

O te utuhiraa ana'e ia te baptizoraa. Te auraa no te parau baptizo, e utuhi ia, oia hoi ia tapoi-roa-hia i te pape.

Ia baptizohia Iesu, haere maira oia mai raro mai i te pape. Mataio 3: 16. Ua haere Philipa raua te eunuka atoa i raro i te pape, ia baptizohia te eunuka. Ohipa 8: 38. Ua faaauhia te baptizoraa i te tanuraa tino pohe. Roma 6: 4.

25. Ta te Haapaoraa êê

Ia baptizohia te mau aiû e tia'i.

25. Ta te Bibilia

Aore roa i au te baptizoraa aiû i ta te Bibilia. O te mau taata ana'e râ e nehenehe ia ratou ia faaroo, Mareko 16: 16; e ia tatarahapa, Ohipa 2: 38; e ia haapao, Mataio 28: 20, te au ia baptizohia.

26. Ta te Haapaoraa êê

E ere ia te baptizoraa i te ravea ora.

26. Ta te Bibilia

O te oroa faaora iho â ia te baptizoraa. Mareko 16: 16. No te haamatararaa ia i ta tatou mau hara. Ohipa 2: 38. Na roto i te baptizoraa ua ahui ia tatou i ta te Mesia ra. Galatia 3: 27.

27. Ta te Haapaoraa êê

E ere ia te baptizoraa no te haamatararaa i te hara.

27. Ta te Bibilia

Te haapii pâpû mai nei te Bibilia e, no te haamatararaa i te hara ia te baptizoraa. Mareko 1: 4. Ua faauehia Paulo ia baptizohia e horoi ê atu i ta'na mau hara. Ohipa 22: 16. Ua faaau ihora Petero i te baptizoraa i te tamâraa-hia o te ao nei na roto i te diluvi. Petero 1, 3: 21.

28. Ta te Haapaoraa êê

Ua ahui ia tatou i ta te Mesia na roto i te fa'iraa ia'na, eiaha no te baptizoraa.

28. Ta te Bibilia

O te uputa ia te baptizoraa no te Basileia o te Atua ra. Ioane 3: 5. I te mahana Penesekote amuihia maira te mau taata faaroo e rave rahi i te Ekalesia na roto i te baptizoraa. Ohipa 2: 41. Ua baptizohia to Roma i roto i te Mesia ra.

Roma 6: 3. Ua baptizohia to Korinetia e te Varua hoê i roto i te tino hoê ra. Korinetia 1, 12: 13. Ua ahu ia to Galatia i ta te Mesia na roto i te baptizoraa. Galatia 3: 27.

29.

Ta te Haapaoraa êê

Ua roaa te Varua Maitai i te taata i te taime i tupu ai to'na faaroo.

29.

Ta te Bibilia

Na mua te faaroo, te tatarahapa, e te baptizoraa, e na muri te roaaraa mai te Varua Maitai ra. Ohipa 2: 38. Ua horoahia te Varua Maitai ia ratou o tei haapao. Ohipa 5: 32. Ua ite Paulo e, na muri te roaaraa te Varua Maitai i te faaroo, i ui atu ai oia i to Ephesia e, "Ua noaa anei ia outou te Varua Maitai i to outou vai faaroora nei?" Ohipa 19: 2-3.

30.

Ta te Haapaoraa êê

E ere ia te tuuraa rima i te ravea no te horoaraa i te Varua Maitai.

30.

Ta te Bibilia

O te tuuraa rima, o te hoê ia haapiiraa pâpû a te Mesia. Hebera 6: 2. Na roto i te tuuraa rima i noaa'i te Varua Maitai i to Samaria. Ohipa 8: 17. E oia atoa i te feia no Ephesia. Ohipa 19: 6.

31.

Ta te Haapaoraa êê

Na te Bibilia i horoa mai i te mana no te raveraa i te mau ohipa o te Evanelia.

31.

Ta te Bibilia

O te Bibilia nei, o te parau tuatapapa noa ia o te maiti-raa-hia te mau taata o te Atua e no ta ratou mau ohipa i te mau tau tahito ra. E ere roa ia te Bibilia tei horoa mai i te mana no te a'oraa i te Evanelia a Iesu Mesia e no te raveraa i te mau ohipa no Ta'na ra Ekalesia. Ia noaa i te taata nei te mana no te a'oraa i te Evanelia, ia maiti-mau-hia oia mai ia Aarona e tia'i. Hebera 5: 4. Ua maitihia

A'arona e te Atua na roto i te hoê peropheta ora. Exodo 28: 1.

32. Ta te Haapaoraa êê

Aita i titauhia te mau aposetolo e te mau peropheta urûhia i roto i te Ekalesia i teie nei anotau.

32. Ta te Bibilia

Ua tuuhia mai te mau aposetolo, te mau peropheta, e te mau toroa atoa i roto i te Ekalesia "ei faaau i te feia mo'a i te ohipa ra e orometua, ia tupu i te maitai te tino o te Mesia ra." Ephesia 4: 12. E ia vai tamau ia i roto i te Ekalesia "ia riro tatou atoa nei ei taata paari, i te faaroo hoê e te ite hoê i te Tamaiti a te Atua." Ephesia 4: 13. E mea amahamaha noa e te taa ê te mau huru haapaoraa i teie â tau, e no reira ua au roa i teie nei â te mau aposetolo e te mau peropheta.

33. Ta te Haapaoraa êê

Noa'tu te rahiraa o te mau haapaoraa, na te Atua ana'e ia ratou ra.

33. Ta te Bibilia

E ere ia te Atua i te tumu no te anoi noa. Kor. 1, 14:33. E ere ia Iesu i te mea amahamaha. Korinetia 1, 1: 13.

34. Ta te Haapaoraa êê

E rave rahi te mau e'a e tae atu ai i te basileia e te ao.

34. Ta te Bibilia

Te vai ra hoê noa iho Fatu, hoê faaroo, e hoê bapetizo. Ephesia 4: 5. O te e'a piri ra ia, o te hoê ana'e ia e'a e tae atu ai i te ora. Mataio 7: 14. Faaara atura Paulo i to Roma ia hi'o maitai i te feia faataa ê. Roma 16: 17.

35. Ta te Haapaoraa êê

E parahi hoi te feia parau-tia i roto i te mau fare rahi teitei no te ra'i ra.

35. Ta te Bibilia

O te ao nei iho â ia te parahiraa mure ore no te feia parau-tia ra. Genese 13: 15. "E ao to tei mârû, e riro hoi

ia ratou te fenua." Mataio 5: 5. E parahi hoi Iesu i rotou i te feia parau-tia i nia i te fenua nei. Apokalupo 21: 1-3. 36.

Ta te Haapaoraa êê

O te haereraa piti mai o te Mesia i parauhia ra, e haereraa varua ana'e ia.

36.

Ta te Bibilia

Ua tia faahou mai Iesu mai te pohe maira, e pee atura oia i nia i te ra'i ra ma te tino i'o e te ivi. E te faaite pâpû nei te parau a te Atua e, "o Iesu nei â, tei ravehia a'enei i nia i te ra'i, e ho'i mai ia mai te reira atoa." Ohî. 1: 11. E mea hi'o-pâpû-hia to'na taeraa piti mai. Mataio 24: 27. Na'na iho e faatere i nia i te ao nei i roto i te hoê tausani matahiti. Apokalupo 20: 4.

Parau Faaotiraa

Ua faaite pâpû atura te Peropheta ra o Iosepha Semita i te parau mau o te Bibilia no teie nei mau parau Evanelia e hope roa'e ra; o tei faatia pâpû mai e, e Peropheta mau oia na te Atua ra. Aita'tu ravea i noaa'i ia'na te ite e te maramarama no taua mau mea nei, a haapâpû atu ai oia i to te ao nei, maori râ na roto i te mau heheuraa no ô mai i te Atua ra.

—*Faaauhia e Reda Merila*

Te Hoê Parau Ihi ei Faaitoitiraa

(Tuatiraa teie nei parau.)

73. "Te Hitu Ahuru ra"—Tei roto hoi i te Ekalesia tahito te hitu ahuru ra. Num 11: 16-17; 24-25. I te tau o te Mesia ua tatoopitihia ratou e ua tonohia e poro-haere i te evanelia i te mau oire e te mau vahi atoa ta Iesu i opua e e haere atoa oia i reira ra. Luka 10: 1. I mari a'era ua ho'i faahou maira ratou ma te oaoa, no te mea ua manu'a ta ratou ra ohipa. Luka 10: 17. Tei ô ratou ra te mana mau o lehova.

74. "Te mau Peresibutero"—Tei roto i te Ekalesia a te Mesia i Ierusalema te tahi mau peresibutero ra. Ohipa 15: 6. Ua faatoroa'tura hoi Paulo raua o Baranaba i te tahi mau peresibutero i roto i te mau ekalesia e rave rahi ta raua i mataitai i to raua mau haerea. Ohipa 14: 23. O te tahi mau peresibutero atoa hoi tei rotopu i te mau purutia i Ponoto, i Galatia, i Kapadokia, i Asia, e i Bitunia ra. Petero 1, 5: 1; 1: 1.

75. "Te mau Patereareha ra"—E patereareha ia Aberahama ra. Hebera 7: 4. Ua mau atoa hoi te mau tamarii tamaroa a Iakoba i taua toroa ra. Ohipa 7: 8-9. No te mana o to'na ra toroa ua haamaitai atura Iakoba i ta'na ra mau tamaiti e tino ahuru e ma piti ra, i te faaite-raa'tu ia ratou i te mau mea e tupu a muri atura. Genese pene 49. E patereareha hoi ia Davida ra. Ohipa 2: 29.

76. "Te mau Episekopo ra"—Tei te amaa o te Ekalesia i vai i Philipi ra te tahi mau Episekopo ra. Philipi 1: 1. Te faaite maira Paulo e, e ohipa maitai roa ia te ohipa na te episekopo i roto i te ekalesia ra. Timoteo 1, 3: 1. Ia riro te taata o tei mau i taua toroa ra ei taata haapao maitai e te hapa ore e tia'i, no te mea e ohipa popou te tuuhia mai i roto i to'na ra rima. Tito. 1: 7.

77. "Te mau Tahu'a ra"—O Zakaria, te metua tane no Ioane Bapetizo ra, e tahu'a atoa ia oia ra. Luka 1: 5. Ua ite a'era Ioane pipi here i roto i ta'na mau orama ra e, ei roto a hoi te tahu'a i te ekalesia ia tae i te mahana hopea ra. Apokalupo 5: 9-10. E riro hoi te feia tei noaa te tia-faahou-raa matamua ra ei tahu'a na te Atua, e e parahi ai ratou i nia i te fenua nei i pihai iho i te Fatu ra, e ia hoê tausani matahiti, i te haapaoraa i te ohipa o taua toroa ra. Apokalupo 20: 6.

78. "Te mau Haapii ra"—Ua haapao ihora te Mesia i te mau haapii i roto i te ekalesia ra. Ephesia 4: 11. Tei roto i te amaa o te ekalesia i Anetiohia e tau peropheta e te orometua, (oia hoi te haapii) i te mahana i faataahia'i Paulo raua o Baranaba no te ohipa i rotopu i te mau etene ra. Ohipa 13: 1.

(E tuatihia teie nei parau.)

Te Mau Parau Apî Radio

Te opuahia ra te hamaniraa i te hoê fare rahi roa i Amerika, ei fare piha toroa no te feia faatere ohipa i taua fenua ra. Ua oti ia to'na hoho'a i te papaihia, e ua ineine te mau mea no te haamataraa o te ohipa. E toru ahuru ma hitu tahua to teie fare apî, e no to'na aano e te roa atoa, ua parauhia e, e riro teie te fare piha toroa rahi roa i te ao atoa nei.

Ua tupu te orurehau i roto i te fenua Hondure, i Amerika Apatoa, e haapeapea-noa-hia ihora te mau hau êê i reira. Ua taero te mau taata e rave rahi i te ava, a pûpûhi atu ai ratou i te mau fare no te Hau Amerika. Tonohia atura na pahi manuâ i taua fenua ra, e tae atura na pupu faehau Amerika i roto roa i te oire rahi. Tei reira ratou i teie nei â, mai te paruru i te mau faufaa a te Amerika, e mai te tamata i te faaore i te orurehau.

Faaiteraa no Ruru

Ia hinaaro outou i te tape'a, e te uati, noa'tu te huru;

Ia hinaaro outou ia hamanihia to outou mau tape'a, te pine, te tautau;

Ia hinaaro outou ia tataihia to outou mau tape'a;

Ia hinaaro outou i te hoo mai i ta outou mau tiko, te patoetoe, te mau tape'a tahito, te hei pupu, etc.;

Ia hinaaro outou ia papaihia to outou mau i'oa i nia e aore râ i roto i to outou mau tape'a, te pine, e te tautau;

Ia hinaaro outou ia faaapihia to outou mau tape'a tahito;

Haere i o Ruru

*to'na iho â fare parai rea ute
te aroa Petite Pologne*

PAPEETE

NENEIRAA HOHO'A

Noa'tu te huru e te faito i hinaarohia, e oti nehenehe i ò nei ia Viriamu.

O te mau huru ohipa hoho'a e ravehia nei.

William Crake

I pihaito i te Fare Moni Initia Taina

PAPEETE

Te vai ra i mua i te to'a a Ruru te parau apî RADIO i iritihia na roto i te re'o Tahiti.

Ua faaaunia te hoê motoraa i ropu ia Georges Carpentier, taata moto rahi no Farani, e Tommy Gibbons, te hoê taata moto rahi no Amerika. Ua parauhia e, hoê ahuru ramu papu to teie motoraa, e ua faaaunia no te 4 no Tiurai i mua nei, i te tufaa fenua Michigan, i Amerika. Te opua ra o Carpentier e faarue i te fenua Farani i te 1 no Me, a reva'tu ai i Amerika. Te tauturu atoa ra o Dempsey, taata moto rahi no Amerika, i te faaineineraa i te mau ohipa no teie motoraa a Carpentier raua o Gibbons, e ua parauhia e, e riro paha Dempsey i te maitihia ei refere no taua motoraa ra.

Tao'a Apî Farani

Mea rahi te taihaa apî no nia mai i te pahi rahi Farani.

Pereoo taataahi tane e te vahine—te au'a e te mereti—e ua rau te huru te ahu Farani ana'e.

Ia mataitai ana'e ua rave iho â.

Fare Toa No Aiu.

FARE TAMAARAA TINITO

I Tatahi lei fatata i te fare toa no Pute

Teie te Hooraa

Te mau roi auri, roi raau, roi veo;
Te mau afata ume, afata roa, afata
raau noanoa, afata ma'i (pohe);
Te mau huru UPAUPA, Mandoline, Guitare, Ukulele, e to'na mau niuniu atoa;

Te mau huru peni vaa, Fare, Pereoo, Afata Ume, e te tahi atu â.
Tei reira'toa hoi te hamani raa e te tatairaa i te mau huru haneti atoa.
Tei reira'toa te mau hahu raa, e te êê raa raau.

Tei reira'toa te tarahu raa Pereoo uira: taniuniu noa io Bambridge, Papeete, ia tae atu te Auto, noa'tu te hora i te pô e te ao.

Bambridge, Dexter & Co.

oia hoi io TIHOTI MAEHAA

Ua Faaroo Tatou

I te parau apî o te tauî o te moni Marite e te moni Beritane—e no reira ua pee te moni o te mau taihaa i nia.

Mea Mama ta Pute

Aita râ te moni o te pua i te faretoa a Pute i haerei nia, no te mea no Tahiti iho nei te hamani-raa-hia.

Hoê Noa Iho Afa i te Pâ

A. Loboucher

PAPEETE

Tamuta Hamani Pahi e te Fare

Mai te mea e, te opua nei oe i te hoo i te tahi poti tere roa a'e i te tahi atu â mau poti, haere iê PERO, oia hoi, F. R. & I. E. WALKER, na ratou e hamani i taua poti ra ma te maitai e te hoo māmā.

Haere na a mataitai i ta ratou mau hoho'a poti, haere na a mataitai i ta ratou aua hamaniraa pahi.

Farerei na ia PERO ma, no te hamaniraa i to oe fare, eita oe e tata-rahapa.

Afai na ta oe mau iri raau i hipaaro i te êê e te haku ia PERO ma, na ratou e rave.

F. R. & I. E. WALKER

PAPEETE

I roto i te avae Mati i mairi a'enei, te faaterehia ra te tahi mau pahi tama'i no te Hau Iapone, ei tamataraa, e ū atura te hoê pahi hopu i te tahi pahi manuâ rahi, e paravî a'era te hoê tufaa no te pahi hopu. E piti ahuru ma maha taata i pohe i tana taine ra, a tomo roa'i te pahi hopu, e te toe ra e hoê ahuru ma vau taata i tapea-ora noa-hia i roto i te pahi. I muri a'era, paraparau maira tana mau taata i tapeahia ra na roto i te niuniu paraparau, mai te faaite mai e, te ora noa ratou, tera râ te pau ra te mata'i, e mai te mea eita ratou e tauturu-oioi-hia, e pohe iho â ratou paatoa. Ua faataahia e te feia faatere na taata hopu e hoê ahuru, e ravehia ihora te mau fifi, mai te mana'o e, e tapeahia te mau fifi i te pahi i tomo, a hutihia mai ai i nia. E tamata noa râ ratou i te mau ravea e rave rahi, aita i manuia, e te vai noa ra te mau taata i tapeahia i roto i te pahi hopu, e pohe ana'e ihora ratou paatoa.

O. B. Peterson, Imprimeur,

Rue Bréa et de la rue Dumont d'Urville, Orovini, Papeete